

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ 2010. godine, d o n o s i

NACRT

ZAKON
O ZAŠTITI OD POŽARA I VATROGASTVU
NA PODRUČJU TUZLANSKOG KANTONA

POGLAVLJE I
OPĆE ODREDBE

Član 1.
(Predmet zakona)

(1) Ovim Zakonom uređuje se nadležnost kantonalnih organa u izvršavanju poslova zaštite od požara i vatrogastvu, obaveze općine/grada i pravnih lica u oblasti zaštite od požara i vatrogastva, organizacija i način funkcioniranja zaštite od požara i vatrogastva na području Tuzlanskog kantona (u daljem tekstu: Kanton), upravni i inspekcijski nadzor, te druga pitanja od značaja za organizaciju i efikasnije funkcioniranje zaštite od požara i vatrogastva na području Kantona.

(2) Ovaj zakon i Zakon o zaštiti od požara i vatrogastvu („Službene novine Federacije Bosne i Hercegovine“, broj: 64/09), (u daljem tekstu: Federalni zakon) predstavljaju jedinstven pravni okvir za vršenje svih poslova zaštite od požara i vatrogastvu iz nadležnosti Kantona, u jedinstvenom sistemu zaštite od požara i vatrogastvu na području Federacije Bosne i Hercegovine.

Član 2.
(Jedinstven sistem zaštite i spašavanja)

Zaštita od požara i vatrogastvo organiziraju se, funkcioniraju i čine dio jedinstvenog sistema zaštite i spašavanja ljudi i materijalnih dobara od prirodnih nepogoda i drugih nesreća (u daljem tekstu: prirodne i druge nesreće).

Član 3.
(Djelatnost od posebnog interesa)

(1) Zaštita od požara i vatrogasna djelatnost su djelatnosti od posebnog javnog interesa za Kanton i općinu, a ostvaruju se na način predviđen Federalnim zakonom, ovim zakonom i podzakonskim aktima, kao i međunarodnim tehničkim normativima i standardima koji važe u Bosni i Hercegovini.

- (2) Vatrogastvo je obavezna javna služba na području Kantona i općine.
- (3) Vatrogasna djelatnost je stručna i humanitarna djelatnost.

Član 4.

(Nosioc organiziranja i provođenja zaštite od požara)

(1) Osnovni nosioci organiziranja, pripremanja i provođenja zaštite od požara i vatrogasne djelatnosti su općina/grad i Kanton, pa su isti dužni osigurati njihovo trajno i neometano obavljanje, na način predviđen Federalnim i ovim zakonom.

(2) Odgovorno lice za organiziranje zaštite od požara je:

- a) vlasnik, odnosno korisnik imovine, kada se radi o privatnom vlasništvu;
- b) rukovodilac organa uprave, upravne organizacije i drugog organa u kantonu i općini/gradu;
- c) direktor, odnosno drugo odgovorno lice u privrednom društvu i drugom pravnom licu, određeno općim aktom pravnog lica.

Član 5.

(Obaveza provođenja zaštite od požara)

(1) Zaštita od požara mora se organizirati i provoditi na svim mjestima, prostorijama i objektima, koji prisutnim ili mogućim opasnostima od požara ugrožavaju ljudske živote ili imovinu drugih vlasnika.

(2) Zaštitu od požara dužni su da organiziraju i provode pravna i fizička lica, kantonalni i opštinski organi i druge institucije koji su vlasnici ili odnosno korisnici građevina i prostora, definisanih u Federalnom zakonu, na način određen Federalnim zakonom, ovim zakonom, propisima donesenim na osnovu zakona, priznatim pravilima i standardima, planovima zaštite od požara, odlukama organa uprave i lokalne samouprave, te općim aktima pravnih lica.

(3) Zaštitu od požara u šumama, na šumskom i poljoprivrednom zemljištu dužni su da organiziraju i provode sva pravna i fizička lica koja su vlasnici ili korisnici istih, kao i organi uprave kantona i općine, koji su nadležni za šume, šumska zemljišta i poljoprivredno zemljište, u skladu sa propisima koji se odnose na šume, šumsko i poljoprivredno zemljište i Federalnim zakonom.

(4) Zaštitu od požara dužni su da provode i građani, u svojim stanovima i stambenim zgradama (kućama) i drugim objektima i prostorima, koje koriste za svoje potrebe.

(5) Vlasnik imovine, u smislu stava 2) ovog člana, je fizičko i pravno lice, državni organ ili druga institucija, sa zaštićenim najširim ovlaštenjima posjedovanja, korištenja i raspolaganja nekom stvari, dok je korisnik imovine fizičko i pravno lice, državni organ ili druga institucija, koji na osnovu ugovora koristi imovinu vlasnika, sa preuzetom obavezom po pitanju zaštite od požara.

(6) Svaki pojedinac ima obavezu da vodi računa da svojim postupcima ne ugrožava živote ljudi i imovinu drugih vlasnika ili posjednika.

POGLAVLJE II
NADLEŽNOST KANTONALNIH ORGANA

ODJELJAK A.
NADLEŽNOST SKUPŠTINE, VLADE, MINISTARSTAVA I UPRAVA

Član 6.
(Skupština Kantona)

(1) Skupština Kantona utvrđuje ciljeve, smjer i strategiju razvoja zaštite od požara i vatrogastva od značaja za Kanton, na period od najmanje pet godina, u okviru Programa razvoja zaštite i spašavanja od prirodnih i drugih nesreća u Kantonu.

(2) Skupština Kantona, na prijedlog Vlade Kantona, donosi Plan zaštite od požara Kantona.

Član 7.
(Vlada Kantona)

(1) Vlada Kantona u oblasti zaštite od požara i vatrogastvu:

- a) utvrđuje Procjenu ugroženosti od požara na području Kantona, u okviru Procjene ugroženosti od prirodnih i drugih nesreća u Kantonu;
- b) predlaže Skupštini Kantona Program razvoje zaštite od požara i vatrogastva, u okviru Programa razvoja zaštite i spašavanja od prirodnih i drugih nesreća Kantona;
- c) predlaže Skupštini Kantona Plan zaštite od požara Kantona i obezbjeđuje njegovu realizaciju;
- d) organizira i provodi zaštitu od požara iz nadležnosti Kantona, u skladu sa Federalnim i ovim zakonom, razmatra stanje zaštite od požara i vatrogastva na području Kantona i donosi odgovarajuće mjere za dogradnju i efikasno funkcioniranje zaštite od požara i vatrogastva;
- e) na osnovu Programa iz tačke b) ovog člana, donosi godišnji plan aktivnosti na realizaciji zadataka, utvrđenih za zaštitu od požara i vatrogastvu, što se utvrđuje prema ranije definisanim prioritetima;
- f) na prijedlog Kantonalne uprave, utvrđuje istraživačke i razvojne projekte u oblasti zaštite od požara i vatrogastvu, njihove izvršioce i način finansiranja tih projekata;
- g) donosi akte o organiziranju i funkcioniranju zaštite od požara i vatrogastvu;
- h) organizira zajedničku profesionalnu vatrogasnu jedinicu, u skladu sa potrebama i procjenom o potrebi njenog postojanja, a na osnovu zaključenog sporazuma sa općinama o osnivanju takve jedinice, u skladu sa odredbama Federalnog zakona;
- i) osigurava kadrovske, materijalne, tehničke i druge potrebe za efikasno funkcioniranje vatrogastva u Kantonu;
- j) odgovorna je, zajedno sa jedinicama lokalne samouprave, za funkcioniranje vatrogastva u općinama na području Kantona;
- k) osigurava potrebna finansijska sredstva u budžetu Kantona za potrebe zaštite od požara i vatrogastvo na nivou Kantona;
- l) vrši i druge poslove zaštite od požara i vatrogastva iz nadležnosti Kantona, u skladu sa ovim i Federalnim zakonom i drugim propisima.

(2) Vlada Kantona, svake godine do kraja februara, razmatra i ocjenjuje realizaciju Plana zaštite od požara i predlaže odgovarajuće izmjene sa novonastalim promjenama,

važnim za zaštitu od požara, te osigurava neophodna finansijska sredstva za realizaciju planiranih zadataka.

Član 8

(Kantonalna ministarstva i drugi organi Kantona)

(1) Kantonalna ministarstva i drugi organi Kantona dužni su :

- a) organizirati, planirati i osigurati provođenje preventivnih mjera za zaštitu vlastitih zaposlenika, materijalnih sredstava i objekata koje koriste u svom radu;
- b) učestvovati u izradi planskih dokumenata iz oblasti zaštite od požara i vatrogastvu, u pitanjima iz oblasti za koju su osnovani i koja se utvrde tim dokumentima, i to:
 - 1) Procjene ugroženosti od požara Kantona, u okviru Procjene ugroženosti od prirodnih i drugih nesreća Kantona;
 - 2) Programa razvoja zaštite od požara i vatrogastva, u okviru Programa razvoja zaštite i spašavanja od prirodnih i drugih nesreća Kantona;
 - 3) Plana zaštite od požara Kantona;
- c) u okviru svoje redovne djelatnosti, realiziraju zadatke u oblasti zaštite od požara, koji su utvrđeni u dokumentima iz tačke b) ovog člana i koji se odnose na oblast za koju su osnovani;
- d) donose Plan zaštite od požara za vlastite potrebe, ukoliko su određeni u Planu zaštite od požara Kantona, saglasno federalnom propisu o razvrstavanju građevina tih organa u odgovarajuće kategorije ugroženosti od požara;
- e) ostvarivati stalnu saradnju sa Kantonalnom upravom civilne zaštite o svim pitanjima od značaja za planiranje, organiziranje i provođenje zaštite od požara i vatrogastvu, iz nadležnosti Kantona;
- f) dostavljati Kantonalnoj upravi pisana obavještenja, podatke ili izvještaje o podacima vezanim za pitanje zaštite od požara i vatrogastvu, iz oblasti za koju su osnovani;
- g) ostvariti stalnu saradnju i pružati stručnu pomoć općinskim službama civilne zaštite i općinskim službama za upravu, u smislu osiguranja svih potrebnih podataka pri izradi planskih dokumenata općina, vezanih za zaštitu od požara i vatrogastvu, iz oblasti za koju su osnovani;
- h) vršiti i druge poslove u oblasti zaštite od požara i vatrogastvu, u skladu sa Federalnim zakonom, ovim zakonom, te drugim propisima i općim aktima iz ove oblasti.

(2) Kantonalna ministarstva i drugi organi Kantona, u oblasti zaštite od požara i vatrogastva i u okviru svog djelokruga rada, dužni su svojim općim aktima urediti pitanja koja se odnose na organizaciju i provođenje zaštite od požara, radi zaštite ljudstva i materijalnih dobara koja koriste u svom radu, i to:

- a) utvrditi način organiziranja i ostvarivanje zaštite od požara, u skladu sa Federalnim zakonom, ovim zakonom i podzakonskim propisima;
- b) predvidjeti mjere za provođenje i unapređenje zaštite od požara;
- c) utvrditi način upoznavanja zaposlenih lica sa opasnostima od požara na radnom mjestu;
- d) odrediti dužnost i odgovornost svih zaposlenih lica u provođenju propisanih mjera zaštite od požara;
- e) propisati obavezu i način stručnog osposobljavanja zaposlenih lica s mjerama zaštite od požara i izraditi posebna radna uputstva za to;

- f) odrediti lice zaduženo za staranje o provođenju mjera zaštite od požara, utvrđenih općim aktom;
- g) utvrditi sadržaj i način donošenja svog plana zaštite od požara i način njegovog provođenja;
- h) urediti vršenje unutarnje kontrole provođenja mjera zaštite od požara;
- i) odrediti mjesta i prostore na kojima se zabranjuje upotreba otvorene vatre;
- j) utvrditi dužnosti i način postupanja zaposlenih lica u slučaju pojave požara;
- k) propisati disciplinsku odgovornost za zaposlena lica zbog nepridržavanja propisanih mjera zaštite od požara.

ODJELJAK B. KANTONALNA UPRAVA CIVILNE ZAŠTITE

Član 9

(Upravni, stručni i koordinirajući poslovi)

(1) Kantonalna uprava civilne zaštite (u daljem tekstu: Kantonalna uprava), pored drugih zakonima utvrđenih nadležnosti i obaveza, vrši upravne, stručne i druge poslove u oblasti zaštite od požara i vatrogastvu u Kantonu.

(2) Kantonalna uprava neposredno poduzima mjere i aktivnosti na organiziranju i provođenju zaštite od požara i vatrogastvu na području Kantona, u skladu sa Federalnim i ovim zakonom.

(3) Kantonalna uprava ima i koordinirajuću, usmjeravajuću i podsticajnu ulogu prema svim kantonalnim organima uprave, u dijelu koji se odnosi na zaštitu od požara i vatrogastvu, te obavezu pružanja odgovarajuće stručne pomoći tim organima, kako bi ove poslove vršili pravilno i kontinuirano.

(4) Kantonalna uprava predlaže statistička istraživanja iz oblasti zaštite od požara i vatrogastva za svoje područje.

Član 10

(Odjeljenje za zaštitu od požara i vatrogastvo)

(1) Za vršenje poslova u oblasti zaštite od požara i vatrogastvo, u Kantonalnoj upravi osniva se organizacijska jedinica- odjeljenje za zaštitu od požara i vatrogastvo.

(2) Odjeljenjem za zaštitu od požara i vatrogastvo (u daljem tekstu: Odjeljenje) rukovodi Pomoćnik direktora Uprave – Rukovodilac odjeljenja za zaštitu od požara i vatrogastvo. Za rukovodioca odjeljenja može se imenovati lica koje ima VII stepen stručne spreme, iz oblasti zaštite od požara i sigurnosti ili tehničkih struka, te najmanje pet godina radnog iskustva poslije sticanja stručne spreme. Postupak imenovanja rukovodioca Odjeljenja vršit će se u skladu sa važećim propisima za državne službenike.

Član 11

(Obaveze Kantonalne uprave u izradi planskih dokumenata)

Kantonalna uprava je nosilac aktivnosti oko priprema i izrade planskih dokumenata Kantona, i to:

- a) Procjene ugroženosti od požara Kantona, u okviru Procjene ugroženosti od prirodnih i drugih nesreća u Kantonu, uz obavezno učešće subjekata iz člana 8. stav (1), tačka b) ovog Zakona, a uzimajući u obzir općinske procjene ugroženosti od požara. Način izrade i sadržaj Procjene ugroženosti od požara regulisan je propisom Vlade Federacije;
- b) Programa razvoja zaštite od požara i vatrogastvu, u okviru Programa razvoja zaštite i spašavanja od prirodnih i drugih nesreća Kantona. Program razvoja zaštite od požara i vatrogastva obuhvata politiku, strategiju i akcione planove, u okviru kojih se definira vizija, načela, opredjeljenja, ciljevi i područja razvoja za organiziranje i provođenje zaštite od požara i vatrogastva, sa svim elementima potrebnim za njegovo usavršavanje i efikasno funkcioniranje od značaja za Kanton, za period od najmanje pet godina;
- c) Plana zaštite od požara Kantona, uz obavezno učešće subjekata iz člana 8. stav (1), tačka b) ovog Zakona. Način izrade i sadržaj Plana zaštite od požara propisan je podzakonskim aktom Vlade Federacije. Plan se izrađuje na osnovu procjene ugroženosti od požara na području Kantona i kadrovskim, materijalnim i drugim uslovima koji su od značaja za tu zaštitu, uz obavezno uzimanje u obzir potreba utvrđenih u procjenama ugroženosti od požara svih općina sa područja Kantona;
- d) Godišnjeg plana aktivnosti na realizaciji zadataka za zaštitu od požara i vatrogastvo, utvrđenih u Programu iz tačke b) ovog člana, prema utvrđenim prioritetima, koji donosi Vlada Kantona.

Član 12.

(Praćenje organizacije i provođenja poslova zaštite od požara)

Kantonalna uprava prati organizaciju i provođenje poslova zaštite od požara i vatrogastva u pravnim licima, kantonalnim organima i drugim institucijama u Kantonu, koji su Federalnim zakonom, ovim zakonom i drugim propisima stavljeni u njenu nadležnost.

Član 13.

(Izvršavanje zadataka utvrđenih u planskim dokumentima)

Kantonalna uprava izvršava zadatke zaštite od požara i vatrogastva, utvrđene u dokumentima iz člana 11. ovog zakona, i ostvaruje saradnju sa kantonalnim ministarstvima i drugim organima Kantona u izvršavanju zadataka zaštite od požara i vatrogastvu iz njihove nadležnosti.

Član 14.

(Neposredno učešće i pomoć u akcijama)

Kantonalna uprava pruža pomoć u akcijama zaštite i spašavanja ljudi i materijalnih dobara, koji su ugroženi požarom ili eksplozijama, a neposredno učestvuje u akcijama sa kantonalnom profesionalnom vatrogasnom jedinicom, ukoliko je osnovana.

Član 15.

(Planiranje i nabavka opreme)

Kantonalna uprava neposredno poduzima ili predlaže odgovarajuće mjere na planiranju i nabavci tehničkih sredstava i vatrogasne opreme potrebne za vatrogastvo u Kantonu, saglasno zakonskim i drugim propisima iz ove oblasti.

Član 16.
(Informacioni sistem za zaštitu od požara)

Kantonalna uprava , u okviru Kantonalnog operativnog centra, organizira funkcionalni dio informacionog sistema za zaštitu od požara i vatrogastvo, u skladu sa podzakonskim propisom o tim centrima, donesenim na osnovu Zakona o zaštiti i spašavanju ljudi i materijalnih dobara od prirodnih i drugih nesreća, te drugim federalnim propisima.

Član 17.
(Saradnja sa općinskim službama civilne zaštite)

(1) Kantonalna uprava osigurava saradnju sa općinskim službama civilne zaštite na području Kantona, o pitanjima zaštite od požara i vatrogastvu, koja su Federalnim i ovim zakonom stavljena u nadležnost općine i od značaja su za Kanton, te istim pruža stručnu i drugu pomoć, u cilju pravilnog i potpunog vršenja tih poslova, te organiziranja profesionalnih vatrogasnih jedinica općina.

(2) Pod saradnjom iz stava (1) smatra se i međusobno dostavljanje izvještaja i drugih akata, koji se odnose na zaštitu od požara i vatrogastvo, a radi evidentiranja stanja ili daljnje obrade za potrebe Kantonalne uprave, općinskih službi civilne zaštite ili drugih subjekata.

Član 18
(Osnivanje kantonalne profesionalne vatrogasne jedinice)

(1) U slučaju da Kanton osnuje profesionalnu vatrogasnu jedinicu, za potrebe Kantona i svih općina ili nekoliko njih sa područja Kantona, Kantonalna uprava organizira, priprema i provodi sve poslove koji se odnose na osnivanje ovakve jedinice, njenu popunu ljudstvom, planiranju i nabavci vatrogasne opreme, tehničkih i drugih sredstava neophodnih za rad i funkcionisanje takve jedinice.

(2) U slučaju osnivanja kantonalne profesionalne vatrogasne jedinice iz stava (1) ovog člana, na području svake općine bila bi uspostavljena njena ispostava, u skladu sa Federalnim zakonom.

(3) Kantonalnu profesionalnu vatrogasnu jedinicu čine vatrogasci, koji se nalaze u radnom odnosu u Kantonalnoj upravi, u skladu sa Federalnim i ovim zakonom.

(4) Popuna kantonalne profesionalne vatrogasne jedinice i njenih ispostava ljudstvom vrši se, po pravilu, na teritorijalnom principu, u cilju lakšeg ostvarivanja roka za početak gašenja požara, a koji se bliže utvrđuje u Planu zaštite od požara Kantona.

Član 19
(Organiziranje i realizacija obuke)

(1) Kantonalna uprava poduzima i predlaže mjere u oblasti organizovanja i provođenja stručne obuke i osposobljavanja pripadnika vatrogasne jedinice i drugih lica za potrebe vatrogastva, u skladu sa Federalnim i ovim zakonom.

(2) Obuka, vrste tema i način njihove obrade utvrđuju se planovima i programima obuke.

Član 20
(Stručna pomoć dobrovoljnim vatrogasnim
društvima i pravnim licima)

(1) Kantonalna uprava ima obavezu pružiti stručnu i drugu pomoć dobrovoljnim vatrogasnim društvima formiranim na području Kantona, na njihovom osposobljavanju za vršenje poslova iz njihove nadležnosti od značaja za zaštitu od požara i vatrogastvo.

(2) Na način definisan u stavu (1) ovog člana, a posebno radi rješavanja pitanja od zajedničkog interesa za vatrogastvo, Kantonalna uprava će postupati i u odnosu na pravna lica koja su formirala vatrogasne jedinice.

Član 21
(Upravni i inspekcijski nadzor u Kantonalnoj upravi)

(1) Kantonalna uprava vrši upravni nadzor u odnosu na pitanja koja su Federalnim i ovim zakonom stavljena u njenu nadležnost. Nadzor se ostvaruje u kantonalnim organima uprave, općinskim službama za upravu i pravnim licima na području Kantona, u dijelu koji se odnosi na zakonitost, poduzete aktivnosti i mjere u oblasti zaštite od požara i vatrogasne djelatnosti, prema Federalnom zakonu i ovom zakonu.

(2) Kantonalna uprava ima obavezu da organizuje inspekcijski nadzor iz oblasti zaštite od požara i vatrogastva na području Kantona.

(3) Kantonalni inspektor za zaštitu od požara i kantonalni inspektor za vatrogastvo iz Kantonalne uprave vrše nadzor u oblasti zaštite od požara i vatrogastva u općinama i drugim pravnim licima od kantonalnog i općinskog značaja.

(4) Pitanja o kojima se vrši inspekcijski nadzor u oblasti zaštite od požara i vatrogastva, uslovi za postavljanje inspektora, mjere i postupak, definisani su Federalnim i ovim zakonom.

(5) Broj inspektora i posebni uslovi koje moraju ispunjavati, utvrđuju se Pravilnikom o unutrašnjoj organizaciji Kantonalne uprave.

Član 22.
(Saradnja sa Federalnom upravom i drugim
kantonalnim upravama civilne zaštite)

(1) Kantonalna uprava ostvaruje saradnju sa Federalnom upravom civilne zaštite i kantonalnim upravama civilne zaštite susjednih kantona, o pitanjima od zajedničkog interesa za zaštitu od požara i vatrogastvo.

(2) Međusobna saradnja, u smislu odredaba stava (1) ovog člana, ostvaruje se razmjenom podataka, zajedničkim radnim sastancima, obukom, pokaznim vježbama, intervencijama i drugim vidovima saradnje, koji se pokažu opravdanim u datoj situaciji.

Član 23.
(Obaveze kod izdavanja rješenja o građenju i upotrebu građevine)

(1) Kantonalni organ uprave za prostorno uređenje dužan je pribaviti prethodno mišljenje od Kantonalne uprave prilikom donošenja rješenja da li pravno lice ispunjava uslove, utvrđene Federalnim zakonom i podzakonskim propisom, za davanje stručne ocjene i mišljenja da su u tehničkoj dokumentaciji u potpunosti primijenjeni propisi i standardi i drugi normativi zaštite od požara, te da je osigurana funkcionalnost i efikasnost projektom predviđenih mjera zaštite od požara.

(2) Kantonalna uprava daje jednog člana u komisiju za pregled izgrađene, rekonstruirane, dograđene ili nadograđene građevine, ili istog predlaže iz drugog organa ili pravnog lica, koji ispunjava uslove iz Federalnog zakona. Bez dokumentiranog mišljenja ovog člana komisije da su provedene sve mjere zaštite od požara, predviđene u elaboratu zaštite od požara, kao i odgovarajuća pravila tehničke prakse, nadležni kantonalni organ uprave ne može izdati odobrenje za upotrebu te građevine.

POGLAVLJE III ZAŠTITA OD POŽARA I VATROGASTVO U OPĆINI I DRUGIM PRAVNIM LICIMA

Član 24.

(Pravno regulisanje i organizovanje zaštite od požara)

(1) Općina je dužna da organizuje zaštitu od požara i vatrogastvo na svom području i vodi brigu o uspješnom sprovođenju i poduzimanju mjera za unapređenje zaštite od požara i vatrogastvu.

(2) Općina je obavezna donijeti propis (odluku), kojom će pravno urediti nadležnosti, organizaciju i funkcionisanje zaštite od požara i vatrogastvo na svom području, u skladu sa Federalnim i ovim zakonom.

(3) Upravne, stručne i druge poslove zaštite od požara i vatrogastva iz nadležnosti općine, vrši organizacijska jedinica za zaštitu od požara i vatrogastvo, koja se nalazi u sastavu općinske službe civilne zaštite.

(4) Općinska služba civilne zaštite predlaže i vodi statistička istraživanja iz oblasti zaštite od požara i vatrogastva za svoje područje.

Član 25.

(Organiziranje vatrogasnih jedinica)

(1) Općina je dužna osnovati svoju profesionalnu vatrogasnu jedinicu ili zajedničku jedinicu, sa jednom ili više susjednih općina, ili sa jednim ili više pravnih lica sa područja općine, na način propisan Federalnim zakonom.

(2) Smatra se da je na odgovarajući način riješeno pitanje vatrogasne jedinice u općini, ukoliko Kanton osnuje zajedničku profesionalnu vatrogasnu jedinicu, pod uslovima i na način propisan Federalnim zakonom.

(3) Profesionalnu vatrogasnu jedinicu u općini čine vatrogasci, koji se nalaze u radnom odnosu u općinskoj službi civilne zaštite. Popuna ove jedinice ljudstvom vrši se, po pravilu, na teritorijalnom principu, što je u cilju ostvarivanja roka za gašenje požara iz stava 6) ovog člana.

(4) U zavisnosti od toga da li profesionalnu vatrogasnu jedinicu osniva sama ili sa drugim općinama ili pravnim licima, općina osigurava kadrovske, materijalne, tehničke i druge uslove za funkcioniranje te jedinice, u skladu sa Federalnim zakonom, ovim zakonom, propisom općine ili sporazumom.

(5) U Planu zaštite od požara, pored drugih zakonom i podzakonskim aktom definisanih pitanja, utvrđuje se minimalan rok za izlazak profesionalne vatrogasne jedinice na intervenciju, imajući u vidu da to bude u što kraćem roku, cijeneći udaljenost pojedinih mjesta od sjedišta te jedinice.

Član 26.
(Snage za obavljanje vatrogasne djelatnosti)

- (1) Snage za obavljanje vatrogasne djelatnosti na području općine su:
- a) osnovne snage za obavljanje vatrogasne djelatnosti, i to:
 - 1) zajednička profesionalna vatrogasna jedinica na nivou Kantona, ukoliko to bude opredjeljenje općine i Vlade Kantona;
 - 2) profesionalna vatrogasna jedinica općine, koju čine vatrogasci u radnom odnosu u općinskoj službi civilne zaštite;
 - 3) zajednička profesionalna vatrogasna jedinica više općina, osnovana sporazumom tih općina, ili profesionalna vatrogasna jedinica osnovana sporazumom općine i pravnih lica sa područja općine;
 - b) dopunske snage za vatrogastvo, koje mogu činiti:
 - 1) dobrovoljne vatrogasne jedinice, koje osnivaju dobrovoljna vatrogasna društva,
 - 2) vatrogasne jedinice pravnih lica;
 - c) snage koje djeluju u toku izvođenja vatrogasne intervencije ili u drugim situacijama, i to:
 - 1) jedinice civilne zaštite;
 - 2) službe zaštite i spašavanja;
 - 3) općinski štab civilne zaštite;
 - 4) povjerenici civilne zaštite.
 - d) operativni centar civilne zaštite, kao komunikacijsko-informacijska podrška općinskom štabu civilne zaštite i drugim organima, koji rukovode akcijama zaštite zaštite na području ugroženom od požara.

Član 27.
(Planski dokumenti u općini)

- (1) Općina, u okviru Programa razvoja zaštite i spašavanja od prirodnih i drugih nesreća općine, programira razvoj zaštite od požara i vatrogastvo, na period od najmanje pet godina.
- (2) Osnov za izradu Programa iz stava (1) ovog člana je Procjena ugroženosti od požara na području općine, koja je poseban dio u Procjeni ugroženosti od prirodnih i drugih nesreća u općini.
- (3) Općina je obavezna donijeti Plan zaštite od požara općine, u kojem se utvrđuje organizacija i funkcioniranje zaštite od požara u općini, što je propisano i definisano Federalnim zakonom.
- (4) u Planu zaštite od požara općine određuju se pravna lica koja su dužna osnovati vatrogasnu jedinicu ili na drugi način osigurati zaštitu od požara, pod uslovima utvrđenim Federalnim zakonom.
- (5) Plan zaštite od požara za vlastite potrebe izrađuju općinski organi i druge institucije, određeni u Planu zaštite od požara općine, u skladu sa federalnim propisom kojim se građevine tih organa razvrstavaju u odgovarajuću kategoriju ugroženosti od požara.

Član 28.
(Informacioni sistem za zaštitu od požara)

Općina je obavezna, u okviru općinskog operativnog centra, organizirati funkcionalni dio informacionog sistema za zaštitu od požara i vatrogastvo, u skladu sa podzakonskim

propisom o tim centrima, donesenim na osnovu Zakona o zaštiti i spašavanju ljudi i materijalnih dobara od prirodnih i drugih nesreća, te drugim federalnim propisima.

Član 29.

(Opći akt u pravnim licima i drugim institucijama)

(1) Pravna lica i druge institucije na području općine dužni su donijeti svoj opći akt, u kojem će urediti pitanja koja se odnose na organizaciju i funkcioniranje zaštite od požara u svojim objektima i prostorima, na način utvrđen u Federalnom i ovom zakonu.

(2) Plan zaštite od požara za vlastite potrebe donose pravna lica, koja su određena u Planu zaštite od požara općine ili Kantona, u skladu sa federalnim propisom kojim su građevine pravnih lica razvrstane u odgovarajuću kategoriju ugroženosti od požara. Način izrade i sadržaj ovog plana utvrđen je propisom Vlade Federacije.

POGLAVLJE IV
INSPEKCIJA ZA ZAŠTITU OD POŽARA I VATROGASTVO

ODJELJAK A.
INSPEKCIJA U OKVIRU NADLEŽNOSTI
KANTONALNE UPRAVE CIVILNE ZAŠTITE

Član 30.

(Inspekcijski nadzor u Kantonalnoj upravi)

(1) Kantonalna uprava, u okviru svoje nadležnosti, vrši poslove inspekcijskog nadzora u oblasti zaštite od požara i u oblasti vatrogastva, prema subjektima i u pitanjima utvrđenim Federalnim zakonom.

(2) Poslove inspekcijskog nadzora, iz stava (1) ovog člana, vrši kantonalni inspektor za zaštitu od požara i kantonalni inspektor za vatrogastvo.

(3) Uslovi koje mora ispunjavati lice za postavljenje na mjesta inspektora iz stava (2) ovog člana, način vršenja inspekcijskog nadzora, mjere koje mogu izreći u toku nadzora, pravni lijek, organ za drugostepeno odlučivanje i druga pitanja, utvrđeni su Federalnim zakonom i podzakonskim propisima, koji se odnose na taj zakon.

Član 31.

(Organizacija inspekcijskog nadzora)

Organizaciono ustrojstvo inspekcijskog nadzora u Kantonalnoj upravi bliže će se definisati pravilnikom o unutrašnjoj organizaciji uprave.

ODJELJAK B.
INSPEKCIJA U OKVIRU NADLEŽNOSTI
DRUGIH KANTONALNIH ORGANA

Član 32.

(Inspekcijski nadzor u Kantonalnom ministarstvu unutrašnjih poslova)

(1) Kantonalno ministarstvo unutrašnjih poslova, u okviru svoje nadležnosti, vrši poslove inspekcijskog nadzora nad provođenjem mjera zaštite od požara, kao i nad provođenjem propisa o tehničkim normativima i standardima koji se odnose na zaštitu od požara, prema subjektima i u pitanjima utvrđenim Federalnim zakonom.

(2) Poslove inspekcijskog nadzora, iz stava (1) ovog člana, vrši kantonalni inspektor za zaštitu od požara.

(3) Uslovi koje mora ispunjavati lice za postavljenje na mjesto inspektora iz stava (2) ovog člana, način vršenja inspekcijskog nadzora, mjere koje mogu izreći u toku nadzora, pravni lijek, organ za drugostepeno odlučivanje i druga pitanja, utvrđeni su Federalnim zakonom i podzakonskim propisima, koji se odnose na taj zakon, te pravilima tehničke struke.

(4) U vršenju svog posla, inspektori za zaštitu od požara, iz stava (2) ovog člana, obavezni su ostvariti saradnju sa inspektorima Kantonalne uprave, u svim slučajevima kada to zahtijeva zajednički interes u rješavanju pitanja iz oblasti zaštite od požara.

Član 33.

(Organizacija inspekcijskog nadzora)

Organizaciono ustrojstvo inspekcijskog nadzora u Kantonalnom ministarstvu unutrašnjih poslova bliže će se definisati pravilnikom o unutrašnjoj organizaciji ministarstva.

Član 34.

(Inspekcijski nadzor zaštite od požara u šumama,
na poljoprivrednom zemljištu i okolišu)

Inspekcijski nadzor nad provođenjem mjera zaštite od požara u šumama i na šumskom zemljištu, poljoprivrednom zemljištu i okolišu vrše kantonalni šumarski inspektor, kantonalni poljoprivredni inspektor i inspektor zaštite okolice, u skladu sa organizacijskim ustrojstvom i ovlaštenjima utvrđenim propisima koji se odnose na te inspekcije.

POGLAVLJE V
KAZNENE ODREDBE

Član 35.

(1) Novčanom kaznom od 5.000,00 KM do 15.000,00 KM kaznit će se za prekršaj pravno lice:

- a) ako ne organizuje i ne provodi zaštitu od požara u smislu člana 5. stav 2.;
- b) ako ne donese opći akt iz člana 29. stav 1.;
- c) ako ne donese plan zaštite od požara (član 29. stav 2) ;

(2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 1.000,00 KM do 2.500,00 KM.

Član 36.

Novčanom kaznom od 1.000,00 KM do 2.500,00 KM kaznit će se za prekršaj rukovodilac ili drugo odgovorno lice organa uprave i upravne organizacije i druge kantonalne, odnosno općinske institucije :

- a) ako ne organizira i ne provodi zaštitu od požara u smislu člana 5. stav 2.;
- b) ako ne donese plan zaštite od požara (član 8. stav 1, tačka d) ;
- c) ako ne donese opći akt iz člana 8. stav 2.;
- d) ako ne postupi u smislu člana 8. stav 1. tačke a), b), c), f) i g);
- e) ako ne uredi svojim općim aktom pitanja iz člana 8. stav 2.
- f) ako ne postupi po odredbama člana 23;
- g) ako ne organizuje zaštitu od požara i vatrogastvo u smislu člana 24.;
- h) ako ne organizuje vatrogasnu jedinicu u smislu člana 25. stav 1 i 2.;
- i) ako ne organizira informacijski sistem za zaštitu od požara i vatrogastvo (član 28.).

Član 37.

Novčanom kaznom od 100,00Km do 800,00 KM kaznit će se za prekršaj fizičko lice:

- a) ako ne organizira i provodi zaštitu od požara u smislu člana 5. stav 2.;
- b) ako ne provodi zaštitu od požara u smislu člana 5. stav 4.;
- c) ako postupa u smislu člana 5. stav 6.

POGLAVLJE VI PRELAZNE I ZAVRŠNE ODREDBE

Član 38.

(Usklađivanje postojećih propisa)

Odredbe kantonalnih zakona i drugih propisa, koji su u suprotnosti sa ovim zakonom, uskladiće se sa odredbama ovog zakona, u roku od jedne godine od dana stupanja na snagu ovog zakona.

Član 39.

(Prestanak važenja kantonalnog zakona i drugih propisa)

Na dan stupanja na snagu ovog zakona prestaje da važi Zakon o zaštiti od požara („Službene novine Tuzlanskog kantona, broj: 9/01) i svi podzakonski akti doneseni na osnovu tog zakona, ukoliko su u suprotnosti sa ovim i Federalnim zakonom.

Član 40.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“, a primjenjivat će se od 01.01.2011. godine.

Bosna i Hercegovina
Federacija Bosne i Hercegovine
TUZLANSKI KANTON
Skupština

Broj:
Tuzla,

Predsjednik
Skupštine Tuzlanskog kantona
Mr. sci. Amir Fazlić